

**Bil. 22**

**Rabu**

**27 Julai 2022**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGKAL KELIMA  
MESYUARAT KEDUA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Mengapakah Permohonan Kewarganegaraan  
Ditolak Tanpa Mengemukakan Alasan**  
- *YB. Tuan Charles Anthony Santiago (Klang)* (Halaman 1)
- **Status Kewarganegaraan Peer Mohamad  
Kadir, Ketua MIC Sabah dan Anak-anaknya**  
- *YB. Tuan Chan Foong Hin (Kota Kinabalu)* (Halaman 3)

**MALAYSIA**  
**KAMAR KHAS**  
**PARLIMEN KEEMPAT BELAS**  
**PENGGAL KELIMA**  
**MESYUARAT KEDUA**  
**Rabu, 27 Julai 2022**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL**  
**BERKENAAN PERKARA TADBIR KERAJAAN (P.M. 17)**

**Mengapakah Permohonan Kewarganegaraan  
Ditolak Tanpa Mengemukakan Alasan**

**2.34 ptg.**

**Tuan Charles Anthony Santiago [Klang]:** Tuan Yang di-Pertua, Yang Berhormat Timbalan Menteri. Permohonan di bawah Artikel 15A mengambil masa bertahun-tahun untuk diproses dan apabila permohonan ditolak, tiada alasan diberi oleh Kementerian Dalam Negeri. Ini bermakna permohonan dibuat dalam bentuk yang serupa akan menghasilkan keputusan yang serupa.

Justeru, saya memohon kementerian untuk mengambil langkah proaktif bagi merungkai permasalahan membabitkan permohonan kewarganegaraan, khususnya melibatkan kes kanak-kanak tanpa dokumen di negara ini. Saya juga memohon Yang Berhormat Menteri menyatakan:

- (i) bagaimana kerajaan akan mempercepatkan proses permohonan kewarganegaraan, memandangkan sesetengah aplikasi mengambil empat hingga enam tahun dalam satu aplikasi;
- (ii) bagaimana kerajaan bercadang untuk menangani peningkatan bilangan kanak-kanak yang tidak memperoleh kewarganegaraan di Malaysia, walaupun kanak-kanak terbabit bukan merupakan mana-mana warganegara dari negara lain;
- (iii) tanpa kewarganegaraan, kanak-kanak tersebut diletak dalam keadaan terdedah, tidak dapat mengakses hak asasi dan sering diabaikan ataupun tertinggal. Masyarakat dan NGO telah melaporkan peningkatan isu kesihatan mental dalam kalangan mereka yang terjejas yang sering menjejaskan keluarga secara keseluruhan. Adakah SOP yang diumumkan pada Januari 2021 berkuat kuasa untuk memendekkan tempoh permohonan dan memberikan sebab penolakan;

- (iv) berapa banyak permohonan kanak-kanak yang masih dalam status proses; dan
- (v) mengapa individu dengan perintah mahkamah masih tidak diberikan kewarganegaraan.

Kerjasama daripada Tuan Yang di-Petua dan Yang Berhormat Menteri bagi mempertimbangkan penjelasan ini didahului dengan ucapan terima kasih.

### 2.36 ptg.

**Timbalan Menteri Dalam Negeri II [Datuk Jonathan bin Yasin]:** Terima kasih Tuan Yang di-Pertua. Yang Berhormat Klang, jawapan adalah seperti berikut, berdasarkan rekod Jabatan Pendaftaran Negara (JPN), sebanyak 22,701 permohonan kewarganegaraan di bawah Perkara 15A Perlembagaan Persekutuan diterima dari tahun 2017 hingga 30 Jun 2022.

Daripada jumlah berkenaan, sebanyak 14,144 permohonan masih diproses. Selain itu, berdasarkan rekod JPN, sebanyak 316 permohonan kewarganegaraan yang diterima bagi anak angkat yang mempunyai perintah pengangkatan oleh mahkamah dari tempoh 2018 sehingga 30 Jun 2022.

Daripada jumlah berkenaan, sebanyak 200 permohonan sedang diproses. Dimaklumkan bahawa pengangkatan tidak menyebabkan seseorang individu di bawah umur 21 tahun diberikan kewarganegaraan secara automatik tetapi perlu membuat permohonan kewarganegaraan di bawah Perkara 15A Perlembagaan Persekutuan.

Untuk makluman Ahli Yang Berhormat, kelahiran seseorang individu di negara ini tidak menjamin kewarganegaraan Malaysia secara automatik bagi individu tersebut. Kewarganegaraan seseorang individu adalah ditentukan berdasarkan kepada status perkahwinan dan taraf kewarganegaraan ibu bapa kandung individu berkenaan sewaktu kelahiran berlaku selaras dengan peruntukan Bahagian III, Perlembagaan Persekutuan, Kaedah-kaedah Kewarganegaraan 1964 [L.N.82/1964] serta perundangan berkaitan yang berkuat kuasa dalam isu pendaftaran perkahwinan, pengangkatan, kesahtarafan anak dan peraturan imigresen.

Bagi kelahiran yang berlaku sebelum pendaftaran perkahwinan ibu bapa mengikut perundangan negara, taraf kewarganegaraan kanak-kanak tersebut adalah mengikut taraf kewarganegaraan ibunya selaras dengan peruntukan undang-undang di bawah seksyen 17, Bahagian III, Jadual Kedua, Perlembagaan Persekutuan.

Isu kanak-kanak lahir di negara ini tanpa dokumentasi hanya akan timbul akibat daripada ibu bapa yang tidak memainkan peranan sebagai ibu bapa yang bertanggungjawab. Kementerian Dalam Negeri (KDN) ingin mengingatkan bahawa menjadi tanggungjawab ibu bapa untuk menguruskan dokumentasi dengan kedutaan negara asal ibu kerana kanak-kanak ini tiada tuntutan sebagai warganegara Malaysia.

Dengan tindakan ini, sekurang-kurangnya kanak-kanak ini masih boleh menggunakan keistimewaan negara asal ibunya seperti boleh memohon dokumen perjalanan negara asal ibunya. Selain itu, KDN dan JPN sentiasa berusaha dan mengambil tindakan proaktif membantu menyelesaikan masalah masyarakat khususnya mengenai isu pendaftaran dokumen pengenalan diri individu yang berkecukupan dengan mengadakan pelbagai program turun padang

dan khidmat nasihat berterusan yang dilaksanakan oleh jabatan seperti Program Menyemai Kasih Rakyat (MEKAR) JPN, Program Aspirasi Keluarga Malaysia dan Program Kita Demi Negara.

Setiap permohonan kewarganegaraan yang diterima oleh KDN dan JPN akan diproses dan diteliti dengan sewajarnya sebelum sesuatu keputusan dikeluarkan. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-kaedah Kewarganegaraan 1964 [L.N.82/1964] serta perundangan berkaitan yang berkuat kuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Permohonan kewarganegaraan dikemukakan secara berasingan dengan kandungan maklumat dan dokumen sokongan yang berbeza-beza, maka hasil penilaian dan pertimbangan juga adalah berbeza mengikut keperluan, bukti dan fakta kes berdasarkan maklumat yang diberikan. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan.

Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes. Sukacita diingatkan bahawa syarat-syarat yang ditetapkan dalam Perlembagaan Persekutuan hanya melayakkan permohonan dikemukakan tetapi tidak menjamin bahawa permohonan akan diluluskan.

KDN juga ingin menegaskan di sini bahawa sebagai sebuah negara berdaulat, penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya seperti yang termaktub dalam Perlembagaan Persekutuan. Terima kasih, Tuan Yang di-Pertua.

### **Status Kewarganegaraan Peer Mohamad Kadir, Ketua MIC Sabah dan Anak-anaknya**

#### **2.41 ptg.**

**Tuan Chan Foong Hin [Kota Kinabalu]:** Tuan Yang di-Pertua, terima kasih Tuan Yang di-Pertua atas memberi peluang kepada saya untuk berucap dalam Kamar Khas ini.

Tuan Yang di-Pertua, pada bulan Februari tahun ini, seorang pekerja binaan bernama Mahathir Peer Muhamad berusia 24 tahun dipenjarakan oleh Mahkamah Majistret di Kota Kinabalu kerana menghalang tugas polis.

Beliau dipenjarakan tiga hari dan didenda RM2,000 kerana beliau dan isterinya melompat keluar daripada kereta selepas berlaku insiden kejar mengejar dengan polis di pusat bandar Kota Kinabalu sebulan dahulu. Pihak polis mengesahkan Mahathir Peer Muhamad adalah anak kepada Peer Mohamad Kadir, Pengerusi Kongres India Malaysia (MIC), Sabah.

Peer Mohamad Kadir, pemegang MyKad keluaran JPN dengan nombor 600323-12-5465 dan H0484432 sebagai nombor IC lamanya, juga merupakan

ahli Dewan Perniagaan dan Perindustrian India Muslim Sabah dan serta seorang ahli Ikatan Relawan Rakyat (RELA).

Peer Mohamad, semasa siasatan Suruhanjaya Siasatan Diraja (RCI) pada tahun 2013, mengatakan beliau dilahirkan di Chennai, India. Beliau juga memaklumkan panel RCI bahawa dia memperoleh Kad Pengenalan Malaysia dalam tempoh enam tahun selepas tiba di Sabah pada 1984. Menurut Peer, beliau tiba di Sabah pada 1984 berusia 20 hingga 24 tahun menggunakan pasport India.

Selepas menunggu enam tahun, beliau memperoleh IC biru Malaysiannya pada tahun 1989, di mana beliau menyatakan beliau dilahirkan di Kampung Bambangan. Dalam satu kenyataan pada 18 Januari tahun ini, Presiden Parti Bersatu Sabah (PBS) Datuk Seri Panglima Dr. Maximus Johnity Ongkili meminta pihak berkuasa menyiasat latar belakang Peer Mohamad untuk membersihkan Sabah daripada masalah PATI.

Beliau yang juga Menteri di Jabatan Perdana Menteri (Hal Ehwal Sabah dan Sarawak) berkata, Pemuda PBS akan membuat laporan polis berhubung perkara itu. Pada bulan Januari tahun ini, Ketua Menteri Sabah, Datuk Hajiji Noor berkata siasatan akan dilakukan terhadap dakwaan Peer Mohamad mendapat dokumen pengenalan diri secara tidak sah selepas beberapa tahun berhijrah dari India ke Sabah selepas beliau dilantik oleh Kerajaan Sabah sebagai Ahli Lembaga Pengarah Sawit Kinabalu.

Di sini, saya ingin bertanya kepada kerajaan apakah tindakan yang diambil terhadap laporan polis Pemuda PBS tersebut? Pada 19 Mei 2022, Perdana Menteri, Dato' Sri Ismail Sabri bin Yaakob juga telah menghadiri majlis jamuan Aidilfitri Barisan Nasional (BN) Sabah di The Magellan Sutra Resort pada 19 Mei 2022 semasa Jelajah Aspirasi Keluarga Malaysia dan Peer Mohamad juga dijemput hadir.

Adakah kerajaan tidak bercadang mengambil apa-apa tindakan bagi membatalkan kewarganegaraan Malaysia dan MyKad Peer Mohamad Kadir dan bagi kesemua anak-anaknya sekiranya ia diperoleh secara tidak sah. Itu sahaja soalan saya. Terima kasih.

#### **2.44 ptg.**

**Timbalan Menteri Dalam Negeri II [Datuk Jonathan bin Yasin]:** Tuan Yang di-Pertua, untuk makluman Ahli Yang Berhormat Kota Kinabalu, pengeluaran kad pengenalan di Malaysia adalah berdasarkan peruntukan di bawah Akta Pendaftaran Negara 1959 [Akta 78] dan juga Peraturan-peraturan Pendaftaran Negara 1990.

Selaras dengan peruntukan perundangan tersebut, mana-mana individu yang memohon kad pengenalan perlulah memenuhi syarat-syarat yang telah ditetapkan di bawah akta dan peraturan-peraturan tersebut.

Mengikut rekod daripada Jabatan Pendaftaran Negara, kad pengenalan bernombor 600323-12-5465 dan H0484432 yang dikeluarkan kepada individu berkenaan adalah sah berdaftar dengan jabatan. Sehingga kini, JPN masih belum menerima sebarang laporan rasmi dan bukti dokumentar berkaitan dakwaan ke atas individu tersebut.

Tindakan pelucutan kewarganegaraan serta pembatalan kad pengenalan ke atas individu berkenaan boleh diambil oleh Kerajaan Persekutuan mengikut Bahagian III, Perlembagaan Persekutuan sekiranya terbukti terdapat kesalahan

dan pelanggaran di bawah akta, peraturan-peraturan dan juga Perlembagaan Persekutuan. Terima kasih, Tuan Yang di-Pertua.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga hari Khamis, 28 Julai 2022, jam 2.30 petang. Terima kasih, Ahli-ahli Yang Berhormat.

***[Kamar Khas ditangguhkan pada pukul 2.45 petang]***